

ՀՐԱՄԱՆԱԻ

Տ. Տ. ԳԱՐԵԳՆԻ ԱՌԱՋՆՈՅ

ՎԵՀԱՓԱՌ ԵՒ ՍՐԲԱԶՆԱԳՈՅՆ
ԿԱԹՈՂԻԿՈՍԻ ԱՄԵՆԱՅՆ ՀԱՅՈՑ

ԽՄԲԱԳՐԱԿԱՆ

Հայտնի խոսք է, որ գթասրտությունն ու բարությունը ոչ մի սահման չեն ճանաչում: Չկա մի պատենք, որ կարողանա արգելափակել նրանց մուտքը մարդկային կյանքից ներս, որովհետև այս երկու ճշմարտությունները մարդու բնական վիճակի կենսական և անբաժանելի մասն են կազմում՝ շնչավորված Աստուծո Հոգով, «ըստ պատկերի և նմանության»: Անշուշտ, հանգամանքների, պայմանների և զանազան պատճառների բերումով, այս առաքինությունները երբեմն մարդու հոգում պարուրվում են ծանր քնով և թմբիրով՝ դառնալով խորթ և անիմաստ երևույթներ: Նույնիսկ դաժան և չար նկատվող մարդը իր սրտի գաղտնարաններում անթեղված, կրում է Աստվածացան սիրո հունդերը և իր կյանքի որևէ հանգրվանում ի հայտ բերում դրանք, ստեղծագործում՝ վերածելով իրական սխրանքի: Այսպիսի մի սխրանքի անձնավորումը դարձավ Նորվեգիայի գավակ, մեծահույակ բնեռախույզ, հետազայում Այգերի Լիգայի նախագահ, ժամանակակիցների բնութագրմամբ՝ «Եվրոպայի խիղճ» Ֆրիտյոֆ Նանսենը:

Նանսեն անունը սերտորեն շաղկապված է փոքր ժողովուրդների իրավունքների պաշտպանության պատմությանը: Իր ամբողջ կարելիություններով, հեղինակությամբ և ունեցած դիրքով նա լծվեց իր նմանի՝ մարդու իրավունքների հաստատման գործին՝ իր անձով իսկ արտահայտելով Տիրոջ խոսքը, թե «սիրեցես զընկեր քո, որպես զանձն քո»:

Հատկապես մեզ՝ հայերիս համար առանձնահատուկ հնչեղություն և բովանդակություն ունի մեծ մարդասերի անունը: Ի թիվս այլ ժողովուրդների, նա Այգերի Լիգայի ամբիոններից բազմաթիվ անգամներ իր ձայնը բարձրացրեց հանուն սեփական Հայրենիքից բռնի կերպով գաղթական և աշխարհացրիվ դարձած, իր պատմության ամենամոռյալ օրերն ապրող հայ ժողովրդի: Սակայն, իրավ է ասված, որ հայտնի բնեռախույզը «կարողացավ ձեռքել մեռյալ Հյուսիսի հավերժական սառույցները և ուղի հարթել, բայց անպոր եղավ հաղթահարելու և հալեցնելու մարդկային հոգու սառույցը»: Նանսենը չսահմանափակվեց միայն ժողովուրդների դատի պաշտպանությամբ, այլև բազմաթիվ ծրագրեր մշակեց՝ նրանց կյանքը բնականոն հունի մեջ դնելու առումով, որում ներառված էր նաև Հայաստանը ջրամատակարարմամբ ապահովելու նրա երապած ծրագիրը, որ կենսական նշանակություն ուներ նոր-նոր հավաքվող և կազմակերպվող հայության կյանքի համար: Ավա՛ղ, այդ գաղափարը ևս մնաց թղթի վրա՝ գրապահոցների մեջ:

Սույն թվաձանի հոկտեմբերի 10-ին Նորվեգիայի մայրաքաղաք Օսլոյում բացվեց Ֆրիտյոֆ Նանսենի ծննդյան 135-ամյակին նվիրված արխիվային վավերագրերից, աշխարհի զանազան թանգարաններից ու գրադարաններից հավաքված Նանսենին վերաբերող նյութերի ցուցահանդեսը:

Բավականին ներկայացուցական այս հանդիսությանը ներկա էր նաև Ամենայն Հայոց Կաթողիկոս Ն.Ս.Օ.Տ.Տ. Գաբեգին Ա-ն: Նորին Արքեպիսկոպոսն էր վերապահված ցուցահանդեսը բացելու պատիվը: Այս փաստն ինքնին ևս մեկ անգամ խոսում է հայ և նորվեգացի ժողովուրդների բարեկամության մասին՝ սրբագործված Ֆրիտյոֆ Նանսենի կողմից: Հայոց Հայրապետն իր ներկայությամբ ողջ հայ ժողովրդի հարգանքի և երախտագիտության թարգմանը եղավ նրա գործի և անվան հանդեպ. «Ես չեի կարող չընդառաջել ձեր հրավերին և այսօր ներկա չլինել այստեղ և ողջ Հայ Եկեղեցու ու ժողովրդի երախտագիտության կենդանի արտահայտությունը չհաղորդել իմ ներկայությամբ և մասնակցությամբ: Ֆրիտյոֆ Նանսենը ձեզ համար եղել է մեծ գիտնական, իսկ հայերիս համար՝ արդարության քարոզիչ ու պաշտպան... Ահա, Հայաստանի և արտասահմանի հայ ժողովրդի անունից ես խոնարհվում եմ Ֆրիտյոֆ Նանսենի փրկավետ գործին և օրհնում նրա անմեռ հիշատակը: Փառք եմ տալիս Աստծուն, որ նրա նման վավակ է շնորհել Նորվեգիայի ժողովրդին, որի բարիքները վայելել են այնքան ազգեր, նրանց շարքում նաև հայ ժողովուրդը»:

Եվ այսօրվա պատությունն նվաճած Հայաստանն ու հայ ժողովուրդը կենդանի, ապրող և շնչող թանգարան են մեծ նորվեգացու՝ սնշահալնդիր բարեկամ Ֆրիտյոֆ Նանսենի համար, ում անունը անխախտելի կերպով պատմակնքված է երկրի քարերին և մարդկանց սրտերին:

Մարդկության բարօրության, համեղբայրության, սիրո և հանդուրժողության հաստատմանն ուղղված ջանքերն ու ձգտումները մեր օրերում նոր որակ են ստացել, հատկապես Եկեղեցիների մեթոդական և փոխըմբռնման առումով: Քրիստոսի Եկեղեցին, երկարատև խզումից հետո, ցանկանում է իր վրայից թոթափել ժամանակների փոշին և գործնականորեն պատասխանել Աստուծո կոչին. «Փառք ի բարձունս Աստուծոյ և յերկիր խաղաղութիւն, ի մարդիկ հաճութիւն»: Նաև Եկեղեցին, որպես երկնքի արքայության ներկայություն երկրի վրա, վերածվել է իրական երկնային Արքայության, «որում ոչ գոյ ցաւ և հեծութիւն», բաժանում և պառակտում, այլ թնածում են անսակարկ սերն ու խաղաղությունը: Ընդհանրական Եկեղեցին այսօր կանգնած է այդ հրամայականի և մարտահրավերի առջև՝ հավատարմություն հայտնելով Աստուծո մարմնացյալ Որդու թափած արյանը:

Հայաստանյայց Եկեղեցին, Գաբեգին Վեհափառի առաջնորդությամբ, ընդառաջ է գնում Եկեղեցու միության առաքելությանը: Բազմաթիվ հանդիպումներն ու երկխոսությունները Քաղկեդոնական Եկեղեցիների Ուղղափառ ընտանիքի Հովվապետների, հոգևորականների և հավատացյալների հետ վկայում են Հայոց Հայրապետի նախանձախնդրության մասին՝ աստվածային սիրո առաքելությանը գործոն մասնակցություն և կատարյալ հաջողություն բերելու համար:

Այս իմաստով նշանակալից իրադարձություն էր Ռումին Ուղղափառ Եկեղեցու Հայրապետ Թեոկտիստ Պատրիարքի այցելությունը Հայաստան՝ Մայր Աթոռ Սուրբ Էջմիածին: Հայ և Ռումին Եկեղեցիների

քարեկամությունն ու եղբայրությունը առավել մերձեցել և ամրացել էր դեռևս երջանկահիշատակ Վաչգեն Ա Կաթողիկոսի հայրապետության օրերին: Եվ այսօր երկու Հայրապետների՝ նախ Գարեգին Վեհափառի Ռումինիա այցելությամբ՝ Ռումին Եկեղեցու անկախության 110-րդ և Պատրիարքության 75-րդ տարեդարձի առիթով, ապա Թեոկտիստ Պատրիարքի այցելությունը Սուրբ Էջմիածին նոր դուռ բացեցին երկու Եկեղեցիների առավել ջերմ հարաբերության և փոխըմբռնման համար:

Իրենց մեծ նախորդներից՝ երջանկահիշատակ Վաչգեն Առաքինից և Ժուստինիան Պատրիարքից երեսուն տարի անց վերստին Սուրբ Էջմիածնում, Գարեգին Ա Վեհափառ Հայրապետի բնորոշմամբ, «հայ ժողովրդի գերագույն սրբավայրին, Մբբություն Սրբոց Մայր Աթոռի Ավագ խորանին վրա կանգնում ենք կողքին մեր սիրեցյալ եղբորը և Ռումինիայի Օրթոդոքս Եկեղեցու Հոգևոր Հովվապետին՝ Թեոկտիստ Պատրիարքին և մեր սրտերն իրար կապած, մեր հավատքը իրար շաղախած աղոթք ենք անում վասն խաղաղության աշխարհին, վասն հաստատության Եկեղեցվո և վասն սերտացման և զորացման մեր երկու Եկեղեցիներին»:

